



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma :

Tir Yimym

tiryimym@aolima

tir yimym

TAPAK 8

Ukraine mezung semdangba India nunger PM ji Modi kumogo

Manchester City-i Barcelona nungi Gundogan tanaben aniokogo



VOL. XXI ISSUE NO. 311 (ADOK 311) DIMAPUR KÜPTOKNÜ (SATURDAY) LUROI (AUGUST) 24, 2024 ₹ 5.00

RPP-i ULB Nomination/GB appointment atema nenshir

Dimapur, August 23, 2024 (TYO): Rising Peoples Party (RPP)-i Nagaland Chief Minister dang ULB nomination aser GB shimdang indigenous Naga tribes dak alaka tangar shinga meshimtsü atema shidi ka zülüogo.

Dimapur Municipal Council (DMC) nung non-Naga indigenous kin nungi nisung nomination asüba magizüker ta RPP-i Nagaland CM dangi züluba shidi ka nung metetdaksüogo.

Advisor Zhaleo Rio-i Muslim nunger ka aser Advisor Tovihoto Ayemi-i Gorkha nunger ka nomination asütsü shidi züluba magizüker ta parnokashi.

"Naga nunger kaketshirtemi iba nomination atema kuli tejangjatem agüja magizükba metetdaksüogo aser onoki kaketshirtemi pusema nungiter. Iba dak alia Nagaland nung indigenous Naga tribes dak alaka Kukis, Garos aser Kacharis ama non-Naga indigenous tribes mali anungji indigenous Naga tribes dang nomination asütsüla" ta RPP Vice President Vitho Zao

as General Secretary Amai Chingkhun nati shidi nung shia lir. RPP-isa PDA sorkar dang New Market nung asür GB Talukdar melena non-Naga nunger shinga meshimtsü ayongzükogo.

Nagaland nung ozüing alema arurtem ajanga lisopurtem lendongbang ka nung alidang asen tarutsü raksatsüsa kar peladaksüba politics meinyaktsüla ta RPP-isa ashi.

April 9, 2010 nü Nagaland sorkari GBs shimba sangdong ka agütsüba melena tasen ka agütsüshitsüla kechiyong taoba sangdong nung metokmeperi aika lir. Anungji iba nung "GB inyaknüba nisung kaji INDIGENOUS TRIBAL citizen of the state asütsüla" ta zülusemstüla. Tesüba sangdong nung "Indigenous" aser "Tribal" olungtem meinok lir aser jilatem nung non-Naga non-tribal Indigenous inhabitants nem GB masü "Representatives" amala nungjia ang agütsütsüla ta RPP-isa metetdaksü.

NLA House Committee senden ayonger

Dimapur, August 23, 2024 (TYO): August 24, 2024 nü Nagaland Legislative Assembly nung House Committee senden ka amentsü metetdaksüogo.

Anepdang 11:00 ako nung Committee Room nung senden amentsü ta NLA Speaker aser House Committee Chairman Sharingain Longkumer-i metetdaksü.

Iba senden nung Committee Members ajak adentsü mepishir ta paisa ashi.

NLA-i Car aser Official Gallery Passes atema metetdaksür

August 27 nungi 29, 2024 tashi 14 buba Nagaland Legislative Assembly indang pungububa session amentsü aliba atema August 22 nungi 24 tashi Car Passes aser Official Gallery Passes agütsür.

Office mapang anepdang 10:00 ako nungi nikongdang 4:00

ako tashi nung arua agizüksü akok ta DIPR sangdong ka nung ashi.

Ministers, Advisors aser AHODs ajaki Special Secretary (Home), Civil Secretariat, Kohima, Nagaland nungi Car Passes aser Gallery Passes meshimtsü akok.

Tanabuba nung MLAs, P.S/P.A to the Members ajaki Reception Counter Gate No-II, Nagaland Legislative Assembly Secretariat nungi aser HODs ajaki Reception Counter, Gate No-I, Nagaland Legislative Assembly Secretariat nungi Car Passes meshimtsü.

IPR aser Media personnel atema Gallery aser Car Passes meshia lir anungji News Room, Directorate of Information & Public Relations nungi agizüksü akok ta DIPR sangdong nungsa shia lir.

Austrian Embassy-i Nagaland nung startup ecosystem asadanger

Dimapur, August 23, 2024 (TYO): StartUp Nagaland-i Department of Industries & Commerce den yaritepa Innovation & Incubation Space (IIS), Kohima nung sentong ka ayonga agiogo.

Innovation & Incubation Space (IIS), Kohima nung agiba roundtable discussion nung Austrian Embassy nungi tongtipang ketdangsürtem, sorkar ketdangsürtem, industry nisungtem aser local startups aden aser parnokashi Nagaland nung startup ecosystem ajungketsü atema tebilebatem lemsatapa liasü.

Iba sentong nung Austrian Embassy nung Commercial Section nung Head of Technology and Innovation Ajay Singh aser Vantage Info nung Organizational Matters nung Advisor Aran Verma na aden.

Austria nungeri Naga nunger den tesentaktep yua shishilembatsü indang tebilemba lemsatap aser idangji Ajay Singh

o Aran Verma nati innovation, technology exchange o capacity building nung lenmang sadema aliba indang ashi.

Sentong nungsa local startups nem parnok business models aser products sayutsü maongka agütsü aser idangji tebilemba balala lemsatapa den shishilembatsü lenmangtem bushitepa liasü.

Austrian ketdangsürtemi Nagaland nung startup sobaliba tajung tenzükba atema tenüngsang agütsü aser tesentaktep ajanga rongsenketzüng renlokba nung yariteptsü nangzük.

Austrian Embassy nung Commercial Section-i Northeast India nung entrepreneurial ecosystem tsütsü fact-finding mission ka ama Nagaland semdangi aru.

Parnoki Northeast India nung inyaktsüba wadangtem repringdangtsü aser asadangtsü. Nagaland nung parnokashi Department of Industries &

Commerce, StartUp Nagaland aser local startups dena sendaktepa alirtem den ajurutepa sensaksemer.

Iba sentong nung Department of Industries & Commerce Director P. Tokugha Sema-i Austrian Embassy aser tanga ketdangsürtem pelashishia agizük aser iba sülen Department of Industries & Commerce Secretary Shanavas, IAS-i tesentepertem pelaa agizükba den Nagaland nung startup ecosystem anepalutsü atema international partnerships nungdakba lemsatap.

Sentong nungsa Department of Information Technology & Communication (IT&C), Investment & Development Authority of Nagaland (IDAN), Software Technology Parks of India (STPI), BAN aser state-empaneled incubators 5-YouthNet Incubation Center, Educentre School of Business, NEILIT, NTTC, aser Nagabots den StartUps aser Entrepreneurs aden.

Chessore nung nisung ka tzümetsüng nung ponger ao

Dimapur, August 23, 2024 (TYO): August 22, 2024 anüngdang kanga dang ajungbena tzünglu arudang Chessore nung tambur ka tzü agi ponger ao.

Iba nisung ya Public Health Engineering Department (PHED) nung pipe fitter nungi sodi angur Mukhe Yimkhiung liasü ta

jangjaogo. Pa ya Watsan Committee nung züngsem ka liasü.

Tzünglu aruba agi pa alu nungi kidangi aodang Ningdangke ayong nung tzü agi ponger ao. Pa ponger aodak nungi metre noklang aika lur pa tasümgang angu.

Alima lendong nung taküm

samaba atema Chessore Village Council-i sobaliba nung benshia aruba ama August 23 nü asür mangyimba anogo ayonga mongogo.

Chessore Village Council-isa bangdak ketdangsürtem dang aluyimeri toktsür aoba kibong nem teyari agütsütsü mepishia metetdaksüogo.

Justice Serto-i ketdangsübaren jungdaksütsü ajungmesor



Kohima, August 23, 2024 (TYO): Loktiliba nung ketdangsübaren jungdaksütsü atema nisung ajak kümdanga repringshima aser tensa osang meteta alitsü nungdaker ta Nagaland State Human Rights Commission (NSHRC) Chairman, Justice S. Serto-i ashi.

NSHRC-i Nagaland State Legal Services Authority (NSLSA) aser Kohima Law College den yaritepa awareness programme ka nung Justice Serto-i iba ya ashi.

"Polling anogo nung asenoki votes enoktsüba sülen democracy metembanger saka anogoshia lir aser sorkari latetba teinyaktsü aser yangluba asalentong balala nung

nübertemi shilem agütsüla" ta Justice Serto-i ashi.

"Nagaland nung tang tasen tenteta aliba State Human Rights commission ket nung meimchir temeten indang tashi ajunga lir saka iba commission dak tetuyuba mesüra ozüing agütsütsü tashi mali" ta pai ashi.

"Law students-i public dang meimchir temetentem asoshi sorkar den külemi yaritepa inyaktsü aser amalitep alitsü osang sangdongtsüla. Law students-i kakat azüngtsüla aser Universal Declaration of Human Rights document kanga junga meteta alitsü tim" ta Justice Serto-isa ashi.

"Iba awareness program agiba ya law students dang

NSHRC metetdaksütsü aser Human Rights wadang nung ajemoka inyaktsü ajungmesotsü atema lir" ta NSHRC member R. Nzanbemo Lotha-i ashi.

NSHRC ya 2023 küm amenok aser Commission dak Civil Court tashi agüja lir ta pai ashi.

Nisung mashii kati human rights anema inyakba mesüra sorkar mapa inyaker kati iba alema inyakshiba atema petition (online dena) agütsütsü akok, ta Nzanbemo-i ashi.

Iba sentong nung NSLSA Panel Lawyer Nagali Shohe-i "Protection of Human Rights Act 1993" aser NSLSA Retainer Lawyer Apila Sangtam-i legal services onüktem jembi.

**OFFICE OF THE
AO SENSO TELONGJEM DIMAPUR**
Dimapur - 797112 : Nagaland
"Telongjem aser Terenlok"

SANGDONGER

Tang osangtsüsang benshiba (social/print media) balala nung DABA senotsü samaba atema osang balala perokshiba ya tang tebushidak alinung, iba mapa tatempang kati maru tashi ajaki aremzüka shilem kecha magi-i atatsü asen kin dang Ao Senso Telongjem Dimapur (ASTD) - i mepishia metetdaksür.

(K. Tsukti Longchar)
Secretary ASTD

GPS Aoyim village school ki tasen ka semzükogo



GPS Aoyim village indang ki tasenba semzükdang tangokba noksa ka nung Temsunaro Aier aser dangartem angur.

Kohima, Luroi/August 23 (TYO): Chümoukedima district kübok Government Primary School (GPS) Aoyim village indang school ki tasenba Hokulbarnü Temsunaro Aier, Commissioner & Secretary IPR and State Mission Director, Samagra Shiksha Nagaland ajanga semzükja liasü.

Ministry of Education, Government of India ajanga 2021-22 mapang approval agiba sülen iba school ki ya yanglua liasü.

Iba sentong nung jembidang Temsunaro Aier-i school ki tasen takok ngua yanglutetba atema tenüngsang agütsü aser Samagra Shiksha ajanga sanction agütsüba dang masü yimtsüng nung lenirtemia iba ki yangluba nung yaritepba atema pelaba lemsatap aser mapa nung temulung asüba shisem.

Nüburtemi aginüba ama

inyaktsü atema school nung nüburtemi shilem agitsü kanga tongtipang lir, ta lai ashi.

Yimtsüng nung iba school ki amenoktsü atema Sunep Lemtur, G.B Aoyim village ajanga ali tuluka agütsüba atema lai tenüngsang agüja liasü.

Yimtsüng nung lenirtem aser tesayurtem den jembidang state-i yimya balala nung kaketshirtemi angazükba tajungba kumdaaktsütsü asoshi rangloker inyaker, ta Aier-i metetdaksü.

Lai iba sentong nung dena alirtem dang Ministry of Education, Government of India indang NAS 2021 aser FLS 2022 report tem indang nenshia ashi, kong state indang achievement level kanga majung lir aser stakeholders dang meranga inyaktsü ayongzük.

Lai tanur kata senzüka

metoktsütsüla aser yimdaklir temi iba school nung maneni shilem agitsü ayongzük, ta ashi.

Tarutsü nung iba school ya high school mesüra higher secondary school kuma indaktsütsü asoshi maneni yariteptsü ajungshia liasü.

Iba sentong nung Aotula Anichari, Teacher GPS Aoyim menden liasü aser Lanuzulu, Pastor ABC ajanga Tsüngrem temoatsü jazüka sarasadem aser Imlinuken Ao, Chairman village council aser Lima G.B nati melepzüng o jembia liasü.

Iba sentong nungya yimtsüng nung lenirtem, tesayurtem, taoba MLA Dr. Longri, District Education Officer, N. Meyase; Sr. SDEO Dimapur, SDEO Chumoukedima, EBRC ketdangsürtem aser District Education Office Dimapur nung ketdangsürtem dena liasü.

National SC-ST Hub Schemes indang awareness agütsü

Dimapur, Luroi/August 23 (TYO): Women Entrepreneurs Network Nagaland (WENN) ajanga National SC-ST Hub, Guwahati den lungjemer August 23, 2024 nü ‘Special Awareness Programme on National SC-ST Hub (NSSH) Schemes’ onük nung ajemdaker Hotel Saramati, Dimapur nung National SC-ST Hub Schemes indang workshop ka ayongzüka liasü. Iba workshop nung wadang

balala nungi tetsür entrepreneurs tem arua aden, kong National SC-ST Hub Office, Guwahati nungi subject experts temi o jembia liasü.

Iba sentong nung Credit Support, GeM Registration aser Tender Participation amala onüktem awajema jembia. Iba workshop ya Nagaland nung tetsür entrepreneurs nem tashi balaka agütsütsü asoshi WENN ajanga tenzükba sentong nung shilem ka liasü.

DoTE-i Assam Down Town University den MoU ka zülutep

Dimapur, Luroi/August 23 (TYO): Technical education ecosystem lirumedema anitetsü asoshi tongtipang mera ka agia Directorate of Technical Education, Nagaland aser Assam Down Town University tsüngta Memorandum of Understanding (MoU) ka zülutepa liasü.

agitsü aser Research aser Faculty Exchange tsütsü lungjemer inyaka telok ana tsüngta tesendaktep tajung alitsü nükjidong nung iba MoU ya zülutepa liasü.

Anatsülen kaketshir ajangzüktsü atema programs/ activities/training ayongzüka

Iba MoU ya August 23, 2024 nü Director, Technical Education indang chamber nung zülutepa liasü, kong department ketdangsür aser Assam Down Town University nungi teshimtet nisungtem dena liasü.



Yingli Government College, Longleng nung August 23, 2024 nü Freshers' Day sentong agia liasü, kong sentong akhumdong Imkongnukla Ao, EAC, Longleng kaketshirtem dang takum nung pei nükjidong jangjateta meranga inyaktsü ayongzüka liasü. Chingmei H Phom aser Chuthai L Phom na Mr. and Ms. Freshers shima liasü.

Dimapur nung health centre "The City Barn" semzükogo



Dimapur, Luroi/August 23 (TYO): Arishi küm 24 tekübok aliba teinlonglong lanurtem atema The City Barn, Health Centre for Adolescents Hokulbarnü Super Market Dimapur nung Zavito Ltu, EAC, Dimapur Sardar ajanga semzükja liasü.

Iba sentong Sukhrieno Luho, City Barn Coordinator lenisüba kübok agi, kong Zubenthung N. Shitio, Youth Director Lotha Baptist Church ajanga sarasadema sentong tenzük.

Iba sülen Chenithung Humtsoe, Director BYWCD ajanga City Barn mangdang aser lanurtem lenmang balala nung yariba indang

lemsatapa liasü. Lanurtem nem ‘True Love Waits’ ya kanga tongtipang lir ta angatetdaksütsü kanga tongtipang lir ta pai ashi aser teyari bushitsü atema social media sapang tulu amshitsü ajungshia liasü.

Nübu ayongtentsü asoshi arogo temi tongti shilem agitetsü aser lanurtem nem iba amala service agütsüba metetdaksütsüla, ta pai ashi.

Iba sentong nung Pauhayibe Putlang-i ken ka tena liasü.

Sentong akhumdong Zavito Ltu-i sentong nung shilem agirtem aser talisa lanurtem dang socio-psyco environments nung kanga saksalema alitsü

ajungshia liasü.

Yimti nung lanurtem atema iba ama mapa tajung inyakba atema pai Bethesda Youth Welfare Centre dang pelaba lemsatap, koba Nagaland State AIDS Control Society (NSACS) aser NACO teyari nung lapok.

EAC-isa akokba lenmang nung yariteptsü mulunga lir ta ashi aser state tesem balala nung kasa centre lapokba atema NGOs tem dang pelaba shia liasü.

Sentong tembanga Enoch Kithan-i melepzüng o jembia aser Nagamese Baptist Church, Burma Camp indang pastor Romeo Sumi-i sarasadema liasü.

NVBDCP state review meeting Kohima nung amen

Dimapur, Luroi/August 23 (TYO): National Vector Borne Disease Control Programme (NVBDCP) pur ananü state review senden Directorate of Health & Family Welfare indang Conference Hall, Kohima nung August 21 & 22, 2024 anogotem mena liasü.

kumaka meyi mapang ketdangsürtem saksalema alitsü ayongzük aser NVBDCP staff temi meranga inyaka dengue tashidak azüokba atema pelaba metetdaksü aser merila ama azü ajemba shiruru ajanga menatapa aoba tashidak nungi kumzüktsü asoshi awareness agütsütsü tongtipang lir ta ashi.

Principal Director, DHFW, Dr. E. Motsuthung Patton-i iba senden tenzükba jembidang district aika nung malaria tesamatsür aliba indang lemsatapa liasü.

Tesüiba mapang inyakbatem asadanga tarutsü asoshi sentong yanglutsü atema iba senden ya kanga tongtipang lir ta Dr. Patton-i ashi aser NVBDCP staff tem dang ramen samadaksütsü asoshi saksalema aser bendanga agütsür inyaktsü ayongzüka liasü.

Taoba küm Dimapur aser Mon nung dengue tashidak putetba indang bilemteta pai temulung lema malitsü ashi.

Tang cases tajemba

(Maneni tapak 8 nung...)

Ukraine mezing semdangba India nunger PM ji Modi kumogo



August 23, 2024 nü Ukraine yimtiba, Kyiv nung India nungertemi Ato kilonser, Narendra Modi agizükdang tangokba noksa nung angur.

New Delhi, August 23 (Agencies): Hokolbarnü Ato kilonser, Narendra Modi Ukraine yimtiba, Kyiv tonga ao; pa Poland nungi train nung ghonda ter jajaba sülen Kyiv tonga ao. Ukraine Tir, Volodymyr Zelenskyy-i jaokba nung ajemdaker Modi-i Ukraine semdang. Train station nung Ato kilonser Modi agizükba sülen pa Hyatt Hotel-i ao. Ato kilonser Modi-i Ukraine National Museum nung

Martyrologist semdangba sülen pai Russia-i amakba mapang asür Ukraine nunger tanurtem nem akhüm agütsü. Ukraine Museum nungji Aso 20 aser 21buba mapang nung rara balala indang oacetem aser nungshi osettem yua lir, koba ajanga Ukraine nungertemi linük nüchiso atema raraba, linük nüchiso anguba aser parnok maitsü sayar. Ato kilonser Modi-isa

Mahatma Gandhi kürakyanngu matsükdang asür nem akhüm agütsü. 2020 küm Mahatma Gandhi sor küm 151buba ajungba anogomong nung AV Fomin Botanical Garden nung Mahatma Gandhi kürakyanngu semzüka liasü. Tesülen Mariinskyi palace nung Ukraine Tir, Volodymyr Zelenskyy-i Modi agizük aser tena senden mena tongtibang onük aika nung o lemtepe.

India nunger 43 Nepal nung aliba ayong ka nung tsükok; nisung 14 asü

Lucknow, August 23 (Agencies): Hokolbarnü India nunger tourist bus ka nung Maharashtra nungi nisung 43 mener aoba mapang Nepal nung Tanahu ditric kübok Aanbu Khaireni region nung aliba Marshyangdi ayong nung tsükok. Nepal nung Indian embassy-i ashiba agi, iba lendong nungji arrshi ita trok tanur ka densema nisung 14 asü aser nisung asemo mangur. Anükdang 11:30 ako meta Uttar Pradesh kübok Maharajganj district nungi kilometer 130 shi pilar aliba Tanahu district (Nepal) nung iba lendong atalok. Gorakhpur nung Kesarwani Travels kibur, Vishnu Kesarwani-i Maharashtra tourists' tour package kübok bus asem lezmükja liasü aser passenger temji Maharashtra kübok Bhusawal nungi liasü.

Parnokji Pokhara nungi Nepal yimtiba, Kathmandu-i aoba mapang nung bus asem nungjagi ka lungreni lua Marshyangdi ayong nung tsükok. Vishnu-i, "Nisung kwi asür official osang kü nem memetdaksü, saka Nepal nungi kari kü dang iba lendong nungji nisung 14 nungi 18 shi süogo ta metetdaksüogo," ta ashi. Uttar Pradesh relief department-i sangdong ka ajanga, bus nung nisung 43 nungjagi tebur 17 aser tetsür 26 liasü aser iba lendong nung yirur nisung 22 hospital-i anir ogo, ta metetdaksü. Maharashtra kübok Bhusawal nungi nisung 41 Uttar Pradesh kübok Prayagraj nungi apusoba sülen Chitrakoot, Ayodhya, Gorakhpur, Sonauli, Lumbini aser Pokhara-i anir oa liasü. Osangbenertem den jembidang Relief

Commissioner, G S Naveen-i, "Iba lendong nungi kümzüka passenger ajakji hospital-i anir ogo. Nepal nung Indian embassy-i iba lendong nung tang tashi nung nisung 14 süogo aser nisung asem mangur ta shiogo," ta metetdaksü. Uttar Pradesh state sorkaria Maharajganj district nungi SDM lendong atalokba tesem jagi yokogo aser Ministry of External Affairs (MEA)-ia Nepal ketdangsertem den kümzüka aser nisung bushiba maparen nungji yaritepdar. Iba lendong dak sendakba osang metetpelatsü atema Nepal nung aliba Indian embassy-i emergency contact number: +977-9851107021 sangdongogo. Iba lendong nung asürtem tasü mangji Honibarnü Kathmandu nungi tayimtsü ajanga Mumbai mesüra Aurangabad tashi bener arutsü.

India-i tang mezing National Space Day among

New Delhi, August 23 (Agencies): Hokolbarnü Day anogo nung ajak den (August 23) India nungeri tang mezing National Space Day anogomong, "Touching lives while touching the Moon: India's space saga" omen nung ajemdaker mongogo. Yaküm August 23 nü ISRO indang Vikram Lander ita nung takok ngua anendaksütetba sülen küm ka ajungba anogo nung National Space Day amonger.

Yaküm August 23 nü India-i ita nung takok ngua Vikram Lander anendaksütetba ajanga iba alizung tongteter linük pezübubaji India aküm. Iba alizung tongtetba nungtem nung Ato kilonser, Narendra Modi-i August 23 anogo ya "National Space Day" asütsü, ta sangdonga liasü. Hokolbarnü Ato kilonser Modi den Union Minister tem-Amit Shah, Hardeep Singh Puri, Nitin Gadkari aser Mansukh Mandaviya nungeri X ajanga tepela salem lemsatepa liasü. Modi-i X ajanga,

"Mezingbuba National Space Day anogo nung ajak den tepela salem lemsateper. Asen linüki space sector nung ajangzüketba asenoki nüma tanga bilemteter. Iba anogo ya asen space scientist tem nem tenüsang agütsütsü anogo lir," ta metetdaksü. Paise, "Ozü sorkari space sector dak sendakba nung tarutsü atema telemtetba aika agiogo aser maneni tarutsü nunga telemtetbatem agütsü," ta metetdaksü. Hokolbarnü National Space Day indang tongti sentongji New Delhi nung aliba Bharat Mandapam nung agi aser iba sentongji ISRO indang official website aser YouTube channel nunga 'live' yoka liasü. Mongolbarnü ISRO chairman, S Somanath-i, space agency-i taruba ita missions - Chandrayaan 4 aser Chandrayaan 5 atema design süogo aser iba atemaji sorkar dang nungi temelaba meshitsü atema inyakyim tenzüko, ta sangdonga liasü. Chandrayaan-4 mission kübok ita nungi lung aser ali bener alutsü tebilemba lir.

SC-i Arvind Kejriwal bail temepishiba Sept. 5 nü angadangtsü

New Delhi, August 23 (Agencies): Hokolbarnü Supreme Court-i Delhi Chief Minister, Arvind Kejriwal indang bail temepishiba ken o angadangtsü atema anogo atsülangogo; SC-i September 5 nü ang iba ken o angadangtsü telemtetba agiogo. Delhi excise policy ken o dak sendakba nung CBI-i pa apuba anema pai Supreme Court nung ken o benoka lir. Bench nung Justices ana-Surya Kant aser Ujjal Bhuyan nati iba ken o dak sendakba anema affidavit agütsütsü asoshi CBI nem temelaba agütsüogo aser Kejriwal danga anogo ana tsükdang temepishiba tasen agüjang ta tuyuogo. Kejriwal atema Kejrival apu, aser kasa ken o ken o jembitsür, senior advocate

Abhishek Singhvi-i, temepishiba ken o ka anema dang CBI-i affidavit agüja lir aser ibaji Brihostibar aonung 8:00 ako nung ang parnok nem agütsü, ta metetdaksü. Assistant Solicitor General, SV Raju-i, parnoki ano tanügba temepishiba ken o ka anema hopta ka tsükdang affidavit agütsütsü, ta metetdaksü. Iba sülen bench-i iba ken o ya maneni September 5 nü angadangtsü lemetet. August 14, 2024 nü Supreme Court-i iba ken o nung Kejriwal nem interim bail agütsütsü memelung aser CBI dang nungi telangzüba meshia liasü. Delhi excise policy ken o nung taküm March ita nung Kejrival apu, aser kasa ken o dak sendakba nung CBI-i taküm June 26 nü Kejrival apu.



August 23, 2024 nü New Delhi nung National Space Day anogomong dak sendakba sentong ka nung linük Tir Droupadi Murmu, Union Minister of State for Science & Technology, Jitendra Singh aser ISRO chairman, S Somanath nunger exhibition semdangba mapang tangokba noksa nung angur.

KEN O BENTETTSÜ ATEMA JAOKER
 (ORDER- V, RULE- 1, 5, 20)
 In the court of SEYIELENUO MEZHII Civil Judge SR. DIVISION, DIMAPUR, NAGALAND
 Suit No. :- Money Suit No. 58 of 2024
 Plaintiff :- Canara Bank, Dimapur Branch, Dimapur, Nagaland
 Defendants :- Shri S. Kakheto Jakhalu
 To,
 Shri S. Kakheto Jakhalu
 Prop. of M/s. Trusted Fabrication
 Purana Bazar, Dimapur, Nagaland
 Tekalen shia aliba Plaintiff Bank-i sentsüh Rs. 28,67,410.93 aotsü atema na anema ken o benoker.
 20.09.2024 anogo nung anepdang 10:00 ako nung na mesüra ken o jembitsür Court matsükdangji kechi südir süaka arutsü jaoker aser ken o dak sendakba nung tasükdangba ajak langzütettsüla.
 Iba anogo nungji na marura na meliaka ken o angadangtsü aser telemtetba agütsü.
 August 16, 2024 anogo nung kü meyongnem den Court indang seal agütsür.
 Civil Judge Sr. Division Dimapur : Nagaland
 Civil Judge Sr. Division Dimapur : Nagaland



TIR YIMYIM

YIMOBILEM (EDITORIAL)

DIMAPUR

KÜPTOKNÜ

LUROI 24, 2024

Nagaland nung yi ayoktsü !

A tangji, tanga Nagaland nung yi tapu ajak ayoker saka miimshia ayoker, kechiyong Nagaland nung temesepba yi yanglutsü aser ayoktsü memelar. Ajisuaka, tan August 27 nü nungi amentsü ayonga aliba Nagaland tatar senden nung Nagaland nung yi meyanglutsü aser mayoktsü ozüing lateta aliba ya repringhitsu kilonsertem terenemba lir ta angazükogo. Küm 34 jakdang Nagaland nung moji tzü agi yangluba yi 'rum' yanglua liasü aser rum dang masü saka IMFL (Indian Made Foreign Liquor) yi tapu ajak sademsadema yoka liasü. Ajisuaka, yimten yimsüsürtemi angatetba aser mulungba agi masü saka arogo lenirtemi 'Nagaland Khrista Asoshi' ta asüba lima ka nung yi meyanglutsüla aser mayoktsüla ta tasüa majem telumia lumia kanga sashia nokdakba tashi metizüktet, yimsüsürtemibo Nagaland nung yi yanglunüseta aser yoknüseta, 1989 küm Nagaland nung yi meyanglutsü aser mayoktsü ozüing latet. Iba anogo nung jagi Nagaland ya yi tak ta meyangluba aser mayokba lima ka asütsü meranga aruogo, ajisuaka alima tsüingdang asenok ajak atema tamakok kaji Nagaland nung ozüing raksaa yi teyanglua yanglur aser tayoka ayoker. Asen lima nung yi meyanglutsü aser mayoktsü ozüing züingdaksüba nükjidongji Nagaland nung Naga nungner yi agi taküm aser kibong meraksadaksütsü asoshi arogo lenirtemi nokdakba mapa ka liasü. Ajisuaka, yimsüsürtemi anir Naga nungertem mangatetba agi arogo lenirtemi yi nokdangbaji parnokang jurila tajangzük ka angutsü inyaker amai atalaja aruogo. Aji oda, Nagaland nung yi nokdangba ozüing tamakok anguba yabo kecha tesüingmangtsü mali, kechiyong tamasayongi iba ozüing yanglurtemi memulungi yanglu, anungji mapa küma mouteter. Ibayongji, tanübo yimsüsürtemi dang masü saka Dimapur nungbo asenok ajak dena aliba lokti tentet Naga Council-i dena Nagaland nung tanga tesem nung mayokyonga Dimapur nungbo yi ayoktsüla ta government nem takangba agütsüba asenoki angashiogo. Ibaji Nagaland government asoshiibo anaknüa alidak kongshi amai ser alitsü. Ibayongji, ashiko, Dimapur nung alirtemi aginüba amaji tanga nung mayokyonga Dimapur nungbo yi tajung sen dalang agi jemshia ajemtsüsa yokdaksütsü atema tang nokdanga aliba ozüing ya salatsütsüa akok. Ibaji Dimapur nung aliba arogotem aser arogo nungertemia mulungba asütsü, kechiyong Naga Council nung adener Naga kin ajakji arogo nungner lir. Ibaji dang masü saka Dimapur nung aliba arogo lenirtemibo, akhi 1980s nung alir Tsüingrem tenzükertem ama masü, yi mayoktsü ozüing zünga aliba agientsüba anema ola adokba mangashir. Tetezüji, talisa Dimapur nung alir sannükertem aser arogo lenirtemia Nagaland nung yi yanglutsüla aser ayoktsüla ta asüba tangatetba nungji adener südi. Atangji, yi yangluba aser ajembaji tai masütsüa akok saka asenokbo yi agi raksar, anungji asenok atemabo tang tashi yi yangluba aser yi ajemba ya taküm aser kibong yanglushiba mapa kabo masütsü. Nagaland nung yia yangludangogo aser tayoka yokdangogo saka yi yangluba aser ayokba agi Naga nungner jangratema aliba mapanga mebileteter aser jangratema aliba taküm aser kibonga mangur. Kasaji, Nagaland nung yi meyanglutsü aser mayoktsüa merangdangogo saka Nagaland nung yi jemerbo manener, anungji Naga nungner asoshiibo yi ya ayoka majung aser mayoka majung ta asüba tetsüingda nung, tanü Naga nungner taküm dang masü saka tanüla dena samaa aoba mapang ka lir. Atangji, arogoibo kodanga yi yanglua jemang tabo mashitsu, anungji ola madokba nungji dang yokang ta ashir südi ta government nung alirtemia angateter alitsü. Iba ama tangatetep nung yi ayokdang, yi ayokba sen agi Nagaland tajungba küma yangluabo mangur, aser yi ayoktsü melaba agi taküm aser kibong melenshiba taküm kuli angashitsüa meimlar. Atangji, alima nung ajak angutsü saka kechi achitsüla aser machitsüla, aji meteta aliba agidang taküm aser kibongbo junga alitsü. Kasaji, Nagaland-a yi ayokba sen agi masü saka ochi aser teindang mapa agidang tajungba küma yanglushitetsü.

OLEMSABANG

O ya Tsüingrem lir

L. Kika Pongener

Alima ya tazüingla dang liasü, aser Tsüingremi o agi dang alima, anung, tzüyim, ita, anu, petinu, tesangwa, tammang, ayazüba shiruru, sungdonglidong aser kechisarena ajak yanglu. (Lipok-1:3-24 nung züingra tejangja angutsü). "Tetenzük nung o liasü, aser o Tsüingrem den liasü, aser o-ji Tsüingrem liasü. Tetenzükdang o-ji Tsüingrem den liasü. Kechisarena pa ajanga adok" (Yohan-1:1-3). Yamaji 'o' ya kanga tongtipang, anungji asen bang nungi o ya kanga kümdanga jembizüka yoktsüla. Asenoki asen bang nungi o mashi-mashi jembizüka yokbaji Tsüingrem mezüingmeshiba den sakü lir, anungji o ya kanga kümdanga azüoka jembitsüla. "Kü o mi memesuk no?" ta Kibubai ashir, aser lung anuka raksaba yintem ka memesuk no?". Mitsüktsüjang tilaka nungi mi adokba ajanga koda alima rangben rongreper" (Yerimia-23:29). Yamaji o mekümdangi jembizüka yokba ajanga, yimden, arogo aser loktiliba nung mepetmesu aser telemsa adokdaksür aser nisung mulongjang nung zübo keta yirutsür. Ano o mekümdangi belenshia jembiba ajanga lokti o lokti tsüingda nung aser nubur tsüingda mangatetep adokdaksür. Anungji o ya kanga kümdanga azüoka jembitsüla. Shirnoki ajemalua tangar meyrutsüsa o kümdanga jembir parnok dangji tangateter aser temeter nisung ta ajar aser pa/laji nubur ajaki akümstsübur. Ajisuaka, tangatetba nung anungba nisungi o kanga mekümdangi tazüokba mali jembir. Tsüingrem o-i ashir..."Temeteteri pei o soter, tesungjem mulongsen adenerji tangateter nisung" (A.Shin-17:27). Shirnoki o teblemtemba aser temeteteri ajakbo mejembi-i sota ayur parnok dangji tashitemeter nisung ta ajar, aser teti agia tangateter nisung kati o atasa-a, kanga azüoka jembir aser kanga junga shisadanger dang telangzüba agütsür. O agi nisung o nisung na tsüingda akangtemba ayimer aser o agi-sa tsükchitep atener.

Asen tsüraburi jembia aruba kanga tongtipang onlong ka... "Tekong nung terudangtsü keta lir"... Temulongjang nungi adokba o ajakbo tebang adena madokdaksüi tekong nungi meyokzüka/meyipa yoker. "Shibaisa pei tebang aser temeli sotdir, timtem nungi pei taküm soter" (A.Shin-21:23). Shirnoki pei tebang temeli mazüoki o mashi-mashi jembizüka yoker, item nisungji aiben lendongi ayir, tangar aika den tsükchi atener aser mapang kar nungbo maaksua ajurur. Shirnoki pei tebang temeli azüoka o kümdanga jembir parnokji aiben lendongi aitsüba nungi jenbur. "Noklangnok agi setoktsüba ama mashibangi jembiba otemji lir, saka shisa taka temeli ajanga taneptsü bena arur" (A.Shin-12:18). Mashibangi tapi-tapi agi o mekümdangi jembizüka yokba jagi nisung mulongjang nung noklangnok agi set-toktsüba ama zübo keta yirutsür, saka shisa kaa jembiba agi taneptsü mozü ama zübu ajak anepa kümdaksür. Tetezü...O kanga kümdanga azüoka jembiba agi mangatetep adoktsü aliba-a sunepa kümdaksür. "Ochiba tebangji teti asoshi tenteta alitsü, saka tiyazü temeli-ji khen asoshi dang" (A.Shin-12:19). Shirnoki ochi o jembir parnokji teti numadandang tejak tentet-tenteta alitsü, saka shirnoki tiyazü o tutepa/belenshia jembir...Parnokji kopi meli-i maaksu ajurutsü, kechiaser ajak dang arishi tatsütibaji tiyazü o lir. "Mapang tesutep nung jembiba O-ji taribi yanglokba nung hon sungjang ama lir" (A.Shin-25:11). Aji oda, lokti nunga suang aser kibong nunga suang, mapang tesutep nung tapet o jembibaji, taribi yanglokba hon sungjang ama lir. Shirnoki tensa den apet tetangshi o lokti asoshi kanga junga shisadanga bilemdanger jembir, iba o-ji taribi yanglokba hon sungjang amai lir....Hon-ji kodanga sentsü majentsü, teperangba-teperangba akümstsü... Yamaji shisa kaa jembiba o-ji putu ajak asoshi tapet asütsü aser tensa tia ajak nung tapet asütsü.

(Maneni asüing adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüingri angateta agitsü mepishir

Impur nung temesepba chiyungtsü amshir anepaluba sentong agi



Impur, August 23 (TYO): ABAM Social concern ajanga ayonga Temesepba Chiyungtsü Amshir Anepalutsü Anagzükshiba sentong ka August 23, 2024 anogo nung kanga takok ngua agiogo, ta ABAM Executive Secretary, Rev. Dr. Mar Pongener-i sangdong ka nung metetdaksü..

Iba sentong ya tanü temesepba chiyungtsü ajanga timtem bener arutsüba ajanga asen nübur akoksaba ya shibai kibur küma inyaksü, ta sensaksemba sentong ka liasü.

Rev. Dr. Mar Pongener, Executive Secretary, ABAM ajanga okila jembidang, tanü asen Aortem asoshi tongtibang mapaji temesepba chiyungtsü chiajemertem anepalutsüba ya lir, kechiaser iba ya lokti inti

tebilemtsü lir, anungji asenoki iba ya odang toktsüra asen Aor lokti akoksatsü. Anungji ajaki süoki ia ya kü mapa ta bilema inyakdi, ta ayongzük.

Sentong nung Zone wise lemsar pei Tzükong aser zone nung koba temesepba chiyungtsü bulua amshir aser shibai kibur kümteta inyaksü, ta jembia liasü.


Iba mapang nung Zone ajaki iba tebilemtsü ya arok tebilemtsü lir, anungji tangar dak imla matai, pei akokba nung anepalutsüla ta sensaksem. Iba den külemi Arogo aser Yimten külemi longjemer Administration den consultation sentong akatsü aser Yi tongpang ya lokti tebilemtsü, ta angateta Arogoi dang masü saka lokti ajaki rara nung dang takok lenmang lir ta

jembia liasü. Joko zone nung Task Force shimteta chiyungtsü tamajung amshiba nokdangtsü junger ta jembia. India-i "The Cigarette and Other Tobacco Products Acts" 2003 section 4 nung lokti tesem nung moko machitsü temzüng yanglua lir, iba ya yimtsüng aser Arogo ajak nung takoktsü lenmang lir aser inyaksüla, ta akang-akanga jembia.

Iba sentong nung Shisa Len Sayurtem Mr. Maong Jamir, Secretary, Fin. & Property, ABAM aser Mr. Limasangwa, Coordinator, Media & Social Concern, ABAM liasü.

Ajak agi Arogo 75 nungi Sannükerei anir, Social Concern Convener, Yimten Yimsüsür, Watsü aser Student 288 arua iba sentong nung aden.

Artificial Intelligence ajanga adokdaksüba Yisu noksa saya



Artificial intelligence (AI) site 'Midjourney' i 'Shroud of Turin' nungi adokdaksüba Yisu Khrista noksa.

August 23, 2024: 'Shroud of Turin' sü ya atangji Yisu Khrista süadokba sülen Pa tasü mang alepba sü liasü asütsüa akok, aser Artificial Intelligence (AI) tools ajanga-a iba sü nungjagi Yisu Khrista noksa adokdaksü sayuogo.

'Shroud of Turin' dangji 'Holy Shroud' taka ajar. Iba sü tanep ya süklep (feet) 14 shi liasü, aser iba sü nungji nisung ka tejak tera angur.

Tang iba süji Italy kübok Turin nung aliba St. John the Baptist Tenla kidang yua lir.

Tawa study ka ajanga 'Shroud of Turin' ji Yisu Khrista

aremdang amshiba sü asütsüa akok, ta bushitetogo.

Shroud of Turin ji 1354 kum nguteta liasü, iba sülen northern France nung aliba yimtsüng ka nung mezüing sayaa liasü.

Ajisüaka 1389 kum iba süji tiyazü ta aitsü aser 1980s nung study ka ajanga-a iba sü nung noksaji tiyazü yangluba lir aser iba süji 1260 AD nungi 1390 AD mapang nung amshiba liasü ta jembia.

Ajisüaka 2022 kum x-ray study ka ajanga, süji atangji Yisu Khrista taküm aliba mapang; kum 2,000 tejaklen liasü aser iba süji Yisu asüba sülen Pa

tasü mang aleptsü atema amshiba sü liasü, ta sangdonga liasü.

Artificial intelligence (AI) site 'Midjourney' dang iba sü nung mejangjai aliba noksa nungjagi Yisu Khrista atangji noksa agizükang, ta asüngdanga liasü.

AI ajanga adokdaksüba tebur noksa nungji kouji tabupang dang nungi tera talangba lir aser bangsemo lir. Iba noksaji akhidang nungi amshiba Yisu noksa kürak lir.

Kasa noksa nungjisa Pa tejak aser temang nungji tarak kar keta lir.

ANOGO ABEN TSÜNGREM DEN

Teti Adenba

"Ajiang, alima matem tashi ni nenok den teti dena lir."

Kibuba shia aruba aser kotaki atuba tetsüngda anogo lir tashi liasü. "Kuli jenti agi peisasa parnok dang taküm sayu" - T.M.:1:3. Item anogo lir nütsüngtem den alidang Kibubai tesem ka nung dang nütsüng ali masü, yimya aser mapang balala nung parnok den ajurutepa jembia liasü. Parnok dangi aoksa adoker Pai parnok jembiba ajak angashiba shia liasü. Pa tenük menguaka Thomai jembiba Pai angashiba ashi. Item anogo lir tatem nung Pai tenangzükba tejangja agütsü, "Ajiang, alima matem tashi ni nenok den teti dena lir."

Item mezüing nütsüngtemi parnok tenüki Kibuba menguaka Pa parnok den dena lir ta tangazükba tulu angazük; kasa lessonji nai aser ni angazüker asü masü? Kibuba shia aruba ajanga item tashi mait aser tasü mait nütsüngtem tasü tait aser tashi tait melenshi ta asenoki aiben angashia arur. Saka aji ochiji ibaji dang masü. Parnok tepela, mainshi aliba, Khristai kümzükba ain metsübu kuliji mapa pungu ka nung dang adokdaksüba liasü; mezüingbuba, Pa atangji shia aru; tanabuba, Pai kotak chuba menden nung ajak azüoker; tesembuba, Pa tenük agi mengui parnok den ajaklen alir; pezübuba, Pa tamaren yimli nung tanaben adoktsü; pungububa, Kibuba marudang parnok temang asütsü aser Kibuba den kidang alitsü.

Anogo lir alidang parnoki ochi angazükbaaji tenük agi mengui Kibuba parnok den teti dena lir ta angazük. Pa temang tenük agi ngua aliba dang nungi tenüki mengui parnok den dena alibaji tali sentiba ta parnoki angazük. Pa tang parnok den tenük agi mengui dena lir- Tanela Temeshi ajanga parnok Pa dak lidaktsür! Yamaji tanüa asen Kibuba Yisu asenok den dena lir. Pa adenbaji akhüm ka ama masü, shidakba lir. Ibai tejembiba ka dang masü, mesüra jangratemtsü o ka dang masü. Ibai teti taküm aliba Kibuba chichiba nung asenok den adenba lir.

Pa adenba tetezü, Pa asoshi kuli asü dang timatemdang ajaklen Pa dena aliba lir. Saka iba ama tenangzükba liaka aikati temulung makai akümer aser temulung masür. Koda taochitsü lir! Kodang Pa adenba metetta melilir, asenok melamelaa temulung makai kümdaktsür, ratamatar, atasaa meliteter aser tai telemtetba agir; saka kodang Pa adenba metetta pelaa lidir, temulung makai akümdang tajung inyaksü bilemer, rishikangshi mapang taremsük alir, lendong mapang tasü itdaktsür, telemsatop adokdang süngjema alir, terongjen mapang nung pelaa alir. Lisem limaji kolap naro ama akümer, aser ali tapungji atsüki ka akümer. Khristantem, item otem ken shisadangang: "Ajiang, Ni nenok den tatem tashi dena alitsü...!"

Hong Kong nung Khristantemi school curriculum tasenba ashishir

August 23, 2024: Hong Kong Curriculum nungjisa Hong Kong kaketshirtem atema Kong indang Basic Law aser yimsü dak sendakba shisaliok National Security Law lir. Iba nung temelenshi kanga alitsü, aser iba atemaji Khristan ang benoka liasü.

Iba curriculum tasenba ajanga tamangba yimsü, yimtenren aser loktiliba tsütsü sensotem nem temeden aika magütsütsüa akok, ta Khristan lenirtemi bilemer.

Khristan aser Catholic lenirtem karibo yimjak nung iba curriculum tasenba atema tebilemtsü akaba lemsatopogo.

Khristan lenirtemisa, iba ya School curriculum tasenbaji Buddhist, Khristan, Confucianism, Islam aser Taoism shisaliok atema lir, ta kasa osang ajanga metetdaksü.

China Communist lenirtemi pusema Hong Kong nung lenirtemi maneni yimsü balala amangertem libaliro azüoktsü atema lir, ta metetdaksü.

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Tamamangtsü

(adv) meimlaba mapa, tamangtsüla masü (unbelievable)
* Nagaland nung yi ayoktsüba ya tamamangtsü ka asütsü.

Tamanakshi

(n) temang nung teka agi anakshitsü matongba shilem (back shoulder where fingers cannot reach)
* Temang tesülen tekongnem o terongdong na tsüngdaji tamanakshi lir.

OLONG PAITEP # 6904

1					2				3	4
					5					
6			7					8		
					9					
		10								11
	12									
13						14				
					15					
			16							
17						18				

TIPIEN

- 1. Süngmang - 6
- 3. Taju kümdaktsü - 3
- 5. Jangnem agizükba oset - 3
- 6. Telok tulu - 5
- 8. Chiok - 4
- 10. Tilateri - 7
- 13. Renloka ao - 4
- 14. Atem - 5
- 16. Mapang matong - 3
- 17. Mebilemtet - 3
- 18. Nisung aika senzü - 6

LANGTSÜNGLEN :

- 1. Khu aben - 6
- 2. Arang - 3
- 4. Yimya yimko - 5
- 7. _ _ _ _ tep - 5
- 8. Ku ongtok - 5
- 9. Mesüktep - 3
- 11. Mesak/rürü - 6
- 12. Mapa Atem - 5
- 15. Sentilong - 3

OLONG PAITEP # 6903 TELANGZÜBA

TIPIEN :

- 1. Yiar, 3. Tesola, 7. Yimra,
- 8. Tangar, 9. Peria, 10. Tanur,
- 11. Tasen, 13. Lemjem, 15. Tambu, 16. Khuret, 17. Sang.

LANGTSÜNGLEN :

- 1. Yimti, 2. Amen, 4. Shiner, 5. Alaka, 6. Satan, 9. Putet, 10. Tembar,
- 11. Tatok, 12. Amang, 14. Jala.

NAI-A YA METETTER MA



Bridgeport, USA nungi arishi küm 36 tain tetsür Esperance Lumineska Fuerzina-i la temang nung tattoo atepba ajanga Guinness World Records ana ngutetogo. Fuerzina ya American Army veteran ka lir aser la ya alima putiotsü nung "most tattooed lady" aser "woman with the most modified physique" lir. Küm 10 tsüngda Fuerzina-i la tenükjang aser tekolak nunga implants kar enoka la temang aser tereprangtsü melenshiogo. La temang ajunga nung tattoo agi tepbanga lir aser modifications 89 tashi süogo ta Guinness World Records ajanga ashir.

Manipur MLA 3-i 'Kuki-Zo' nüngja magizükba metetdaksü



Imphal, August 23, 2024

(Agencies): Manipur nung Kuki MLA 10 rongnungi par aseme "Kuki-Zo" nüngja magizükba metetdaksüogo. Par asem ya Thanlon Assembly Constituency nungi MLA Vungzagin Valte, Tipaimukh Assembly Constituency nungi Ngursanglur Sanate aser Churachandpur (ST) Assembly Constituency nungi MLA LM Khaute (ex-IPS officer) nunger lir. Par aseme "Kuki-Zo" ta amshiba nüngja magizükba metetdaksüogo aser iba kin ana

tsüngda maitsü khenyongi balala lir ta ashir. Vungzagin Valte ya "Zomi" nungi Paite Scheduled Tribe nisung ka lir. "Zomi" ajanga ozü nübor putiotsü, sobaliba aser maitsü balaka sayur ta pai ashi. "Kuki-Zo" amshiba ajanga ozü constituency nung alir aika mepelar. Ni ozü constituency külem maitsü atema noktaksü aser iba nung Zomi, Kuki aser Hmar nunger temeyoktep lir, ta MLA Valte-i ashi. Kin ajak sabang ka kübok adentsüsa nüngja tajung ka

yanglutsüla ta paisa ashi. MLA Ngursanglur Sanate-ibo "Kuki-Zomi-Hmar" olen pusema nungitba metetdaksüogo. "Hmar" maitsü madenba olen kodanga magizük aser magizüksü ta pai ashi. Manipur nung kin balala nüngja tim ka nüngdaker ta o atsütepa aruba mapang ka Sanate-i iba osang metetdaksüogo. Paisa Pherzawl District nung aliba kin ajak taginüba atema bendanga agüja inyaktsü ta nenshia metetdaksü. Taoba mapang Director-General of Police (DGP) inyaker LM Khaute-ia kin ajak adenba nüngja ka alitsü metetdaksüogo. Kuki nunger MLA 10-i tesüiba mapang "Kuki-Zomi-Hmar" ta amshia aruogo aser iba nungi ka danga züngdokra magizüksü. Ozü maitsü jangjatsütsü atema tim nüngja ka amshidaktsünür ta MLA Khaute-i ashi.

Mizoram nung gari kiburtem aser driver-i NH-306 mokdang

Aizawl, August 23, 2024

(Agencies): Mizoram-i Assam den sendaktepa National Highway-306 kanga mejungi akümba ajanga gari kiburtemi lungkak aiter. Telok balala nungi gari kibur aser driver temi Brihostibarnü NH-306 mokdanga liasü. Parnoki Assam den arrtsütepa aliba Kolasib nung lenmang mokdang. Parnoki Mizoram sorkar dang lenmang yanglushitsü mepishi saka tang tashi mapa kecha meinyaker ta lungkak aitertemi ashi. Gari ajak Kolasib district

kübok highway nung mesenzüdaktsür. Iba nung nija garitem aser khu abenba garitem dena lir ta Mizoram Tipper Association Kolasib unit Secretary F Lalbiakliana-i ashi. "Iba mokdang kübok medical emergency aser essential services garitem medendaktsür. Kolasib district kübok Vairengte aser Aizawl district kübok Sairang tsüngda NH-306 kanga mejungi lir aser gari senzütsüsa masü" ta Lalbiakliana-i ashi. "Iba onük atema teloktem, state sorkar aser National Highway Infrastructure

Development Corporation Limited (NHIDCL) tsüngda punguben tashi ajurutepa senden menogo saka tang tashi mapa kecha mali. Iba jagi onoki sorkar aser bangdakpur rongshitsü atema lenmang mokdangtsüsa akümer" ta Lalbiakliana-isa shisem. Külen, Mizoram Merchants' Association (MIMA)-ia Kolasib vehicle owner aser driver associations pusema nungitba metetdaksüogo. MIMA-isa shishilembar dang mokdang mapang jenjang matutsü metetdaksüogo.

Thoubal district nung tzümetsüng timtem tulu ajurua lir

Imphal, August 23, 2024

(Agencies): Manipur nung tesüiba hopta ka tashi tzünglu kanga aruba ajanga Thoubal District kübok etsem aika metsüngangba lir. District ktdangsurtem teyari ajanga tanü relief camp ka

lapokogo. Thoubal District kübok Khangabok yimtsüng kanga mejungi metsüngbanga lir. Taküm küm Khangabok yimtsüng nung tzümetsüng timtem tasembenbuba ajurur ta yimdaklir kati ashi. Tawa tzünglu kanga aruba

ajanga alu aika metsüngbang aser kibong 15 nung nisungtem tangalen jenoka lir. August 20 nü Indian Meteorological Department (IMD) ajanga Northeast ajungalen tzünglu kanga arutsü osang metetdakja liasü.



Tripura nung relief & rescue operations atema Assam Rifles Riflemen-i yaritepba noksa nung angur. August, 2024 nungi Tripura nung tzünglu kanga aruba ajanga tzümetsüng timtem tulu ajurua lir. Tang tashi nung lendong balala nung nisung 24 süogo aser relief camp 400 tema lapoka aliba nung nisung lakh 1.28 shi jenoka lir. Iba timtem ajanga Rs 5,000 crore shi akoksaogo aser diarrhea aser tzü ajanga menatepba tashidaktem adoka nisungtem shirangteper.

Taliban-i Afghan tsür nem tenokdangba tesashi agütsür

Kabul, Luroi/August 23 (Agencies): Afghanistan nung tetsür temeden tali nokdangtsü atema Taliban-i ozüing tasen aika yangluogo, aser karbo parnoki 2021 küm nungi tanaben yimsü asüba mapang mera tesashitaba alitsü.

Taliban lenir Hibatullah Akhundzada-i agizükba ozüingtem ya Bodhbarnü sangdong, koba Ministry for the Propagation of Virtue and the Prevention of Vice nungi agütsüba tapak 114 aliba document nung shilem ka liasü.

Ozüing tasenba kübok tetsür temi lokti nung tejak aser temang jungjunga nembangtsü, kechiaser iba

yagi tatidang nungi kumzükur ta ashir.

Iba document indang Article 13 nungya tetsürtemi temang rangben meyibanga sü inokba dang masü lokti nung ken matentsü mesüra ola tulu adoka o mejembitsü ta shia lir.

Tetsürtem ya pei kinunger masüba teburtem mereprangtsü aser teburia pei kinunger masüba tetsür mereprangtsü tenokdangba agütsü.

Item ozüing ya public transport nunga amshitsü, kong ken atemtsü memelar aser tetsürtem kinunger kati memeinra kisüing senzütsü memelar.

Ajidang masü takum

sangnu indang noksa kakat nung menünga prokshitsü memelar, anungji Afghanistan indang media tali azüoker.

Taliban indang Ministry for the Propagation of Virtue nem item ozüing amshitsü tashi agüja lir aser aibelener tem aputsüa tashi agüja lir.

United Nations densema international organisations aikati item ozüing tasen asoshi khuret lemsatepogo, kong talisa tetsürtem mulungjang nung tetsübo tali aiddaktsür.

Iba ama tenokdangba yagi human rights tensa mejungi aliba linük nung tensa tali tamajungba kumdaktsütsü, ta UN-i ashir.

Pelaba Lemsateper

ASO
06.11.1930



ASÜ
11.08.2024

Onoki teti meima aliba obala **Lt. Bendangkokba Jamir** (Mopongchuket) iba alima nungi pila aodang yimer, yimsanger, kiyonger, kidanger, Arogotem, medemertem aser temeimbatem, nenok kwi kati nübo, rongsen aser sarasadem ajanga yaritepogo nenok ajak dang kinungertemi kanga pelaba lemsateper.

Nenok mapa tajung onoki kodanga mamatsü. Tsüngremi nenok taküm aser kibongtem tali moajang ta ozü sarasadem.

Temeim Kinungtsü, Jala aser Semchir.

Kamala Harris-i lenmang tasen leni anitsü nangzük



Chicago, Luroi/August 23 (Agencies): Brehostibar aonung tir atema Democratic nominatagizükba mapang US Vice-President Kamala Harris-i America nunger ajunga lenmang tasen leni anir aotsü nangzük aser telungjem atema jembia voters dang Donald Trump magizüktsü ajungshia liasü.

Tako chitepba, temulung melemtepba ajanga aotsü atema November election ya maongka lir aser tesüiba mapang atema tongpang lir," ta lai Chicago nung lar Democratic party mungdang nung ashi.

Sentsü tanak aser Asian-American tetsür kati party tuluka nungi tir ticket anguba otsü tasen lai yangluogo.

Hopta ishika tejakdang Tir Joe Biden-i White House atema metokteptsü telemtetba agiba sülen kanga kera arishi küm 59 tain Harris ya Democratic nominee akum.

Harris-i minute 45 jungnüa jembidang linük nem la tali tajungba angatetdaksü, koba la indang yimtenren nung tongtipangtiba o jembiba liasü.

Lai Jamaican aser Indian immigrants jala ka ama tebour tajung working-class kiyong ka nung inetba indang lemsatep.

Aser la obendanger mapa inyaka aliba yagi Trump madak takok ngua Oval Office nung tenzüktsü temsüa kumdaktsür, ta ashi. La 2020 küm US tatong tir atema toktepdang lai iba olen mejembi liasü.

Harris-i tetsü asür Shyamala Gopalan Harris ajanga la takum melenshitsuiba indang bilemteta jembia.

“Ochimashiba atema kodanga menemntsü lai onok dang sayu, saka iba atema langka inyaktü ashi,” ta Harris-i ashi.

Iba aonung la tenu arishi küm 57 tain Maya-ia o tatsüka jembidang tetsüi parnok dak teimla tulu liasü ta ashi.

Nisung ajaki toktepa takok angutsü asoshi maongka angutsüsa rongsenketzüng tsütsü maongka adokdaksütsü, ta Harris-i ashi.

Lai America nunger talitsü ki agi anüingba tatem kumdaktsütsü aser entrepreneurs yaritsü, ta ashi. Ajisüaika lai tang la tenzüka aliba administration nungi policy melenshitsu indang tejangja kecha mashi.

Trump-i pa indang social media sapang Truth Social nung Kamala Harris-i jembiba aitsü aser la aitsütsü Fox News jaoka jembia liasü.

La White House nung küm pezü ato kilonser ama inyakdang kechi mapasa inyak, ta pai asüingdanga liasü.

“Kechiba lai ashishiba atema lai kecha meinyaker?” ta Republican-i ashi.

Hopta pongu tejakdang Democrats temi iba sentong nung Tir Joe Biden dak rangloker ayongzükba agitsü bilema liasü, kechiaser pa arishi küm nung tain asüba yong Trump makoktsü ama bilemaka ano kümsük ka atema toktepnüa liasü.

Ajisüaika Trump den o intepba mapang junga shilem magitetba sülen party puri ajungshiba ama July ita tatemlen pai US tir menden atema

metokteptsü aser Harris yaritsü sangdonga liasü.

Iba sülen anogo ishika tsüingta party lenirtem, delegates aser tokteptsü bilema alirtemi Harris yaritsü sangdong. Aser Chicago nunga lai jembiba delegates temi temulung süa agizükogo.

Iba mungdang nung nisung meyrirjang aika adenshia alidak Barack aser Michelle Obama, Bill aser Hillary Clinton, Oprah Winfrey aser Republican telok nungi meyipar temi jembia liasü.

Mezüng aonung arishi küm 81 tain Biden-i jembidang iba milen melenokja liasü.

Democratic National Convention tenzükur aonung pezü buba nung o jembirtemi ‘gun violence’ indanga jembia liasü, koba Harris ya California indang obendanger ama inyakdang aser tatong tir ama inyakdang rangloker kanga meranga inyaka aru.

Taoba küm Biden-i gun violence azüoktsü atema office ka lapok aser aji anitsü Harris nem nungloktsü.

Brehostibar aonung US Vice President Kamala Harris-i Donald Trump kanga sashia aitsü aser Republican presidential nominee ya züingzünger ka masü aser linük nung extremist elements nem tashi agütsür ta aitsü.

“Iba election ya asen linük takum nung tongtipangtiba lir. Bilemdangang, Donald Trump ya tazüokba mali, aser komaka United States tir indang tashi tulu amshia pa kisüing tenzüktsü,” ta Harris-i ashi.

Trump-i taoba election nung tamakok ajurua 2021 küm January 6 nü Capitol nung rongrong adokdaksütsü ajungmesoba indanga lai athishia jembia liasü.

“Alima nung tashi tulutiba linük indang puti otsü nung zülutsüpur nisung ajak tenüing nung ni United States of America indang tir inyaktü atema nenok nomination agizükur,” ta Kamala Harris-i ashi.

Office of the
MONGSENYIMTI SENSO MUNG DANG
B.P.O MONGSENYIMTI P.O. CHUCHUYIMLANG
DIST: MOKOKCHUNG NAGALAND-798614

KHONANG TETUSHI AGÜTSÜR

Taküm nükjidong nükmen meraksai meranga azüingba nung ajemalua Tsüngrem akümtsüba shisa puin tali taroktiba nung bushitetba temoatsü Dr. Sentirenla Ozüküm , (Wb. Senlemmar Ozüküm aser Wt. Talingangla Longkumer jala) ajanga shisashir tem ajaki rangloker khonang Doctor of Philosophy “*Tourism Development In Nagaland : An Alternative For Sustainable Livelihood*” thesis takok ngua Nagaland University nungi renemtetba den külemi ‘Best Research Scholar of the year 2023’ khonang tulu ajangzükuteta, Mongsenyimti sensosanger inti nem meraket nüngsang tulu bentsur aruba tepela Mongsenyimti Senso Mungdang Mendendi ajanga lemsateper.

Tarutsü lanu asensortem asoshi takoteter taküm sempet aser shisatsü asen nuübur libaliro jenjang tejakleni anitsu Tsüngremi maneni moatsütsü sensosanger tamang sarasadem.

Sd/-
(IMOTONG)
President, MSM

Sd/-
(S.NOKINLEMBA)
Secretary, MSM

Macron-i PM bushia France yimten yimsüsürtem ajurur



Paris, Luroi/August 23 (Agencies): France nung taruba sorkar tentetsü atema ananü jembishinü tenzüka Hokulbarnü Tir Emmanuel Macron-i left-wing lenirtem ajurua liasü.

July ita tetenzüklen ajungbena elections agiba nung France yimtenren tatsütep ka nung lir, kechiaser National Assembly nung sorkar kumtetsüsa party tejangja maka.

Paris Olympics mapang caretaker sorkar kati France ania liasü, aser iba yong election nung vote timba nguteta aliba left-wing alliance kanga jashi.

Parnok party pezü agi kumtetba New Popular Front ajanga kanga junga memetetba senior civil servant Lucie Castets ya ato kilonser kumdaktsüner. Ajisüaika arishi küm 37 tain economist ya election nung meshim aser ato kilonseri tir atema meshimtsü amai lir.

France indang political syatem nung tir-i ato kilonser shimer, shiba National Assembly nung majority anir alitsüla. Küm ishika ato kilonser ya tir ama kasa party nungi inyaka liasü, parnok hopta ishika tsüingta shimer.

Ajisüaika Macron-i France nüburtem süngmangdakja June ita round ana parliamentary election agitsü sangdongba sülen par centrist Ensemble alliance ya leftist NFP sülen liasü.

Tir den jembishinütsü atema far-left France Unbowed, Socialists, Greens aser Communists nungi lenirtem den arudang Lucie Castets-i tir dang election result akumtsübotsü aser linük ‘paralysis’ nungi anitetsü ashitsü aru, ta ashi.

France nunger voters temi yimtenren melenshiner ta election ajanga ashiba tiri angateta aliba atema temulung süogo, ta lai mapang tatsüka lir ashi.

(Maneni tapak 8 nung...)

MH10 Kohima-i 13 buba Luke Sasong Memorial Volleyball Trophy 2024 benogo



Mokokchung, Aug. 23, 2024 (TYO): Asemnü (August 21-23) tashi 13 buba Luke Sasong Memorial Volleyball Trophy 2024 yangi Multi-Purpose Sports Complex, Mokokchung nung asaya-a mungogo.

Iba trophy ya Mangmetong Students' Union aküm nung Luke Sasong Sporting Association-i küm ana nung khen ayongzüka akar.

Tesüsabuba asaya (final match) defending champion M.H. 10, Kohima aser Changtongya Volleyball Association na asayaba,

25/23, 20/25, 29/27, 9/25, 15/7, agi CVA madak takok tulu nguteta taküma parnokisa champion atonga benogo.

Semifinal nung Changtongya V/A-i 25/23, 26/24 aser 25/12 agi Ozümi volleyball team pur tsükdaktsü aser MH-10 Kohima-i 25/20, 20/25, 25/18 aser 25/17 agi Itovi Memorial Team, Dimapur pur madak takok ngua final jenjang tongteta liasü.

Takoker champion telok nem senpet sen 70,000/-, tanabuba nem 40,000/- aser semifinal nung tsüker nema meyi ter-er (10,000/- each) agütsüogo. Nija

senpet best spiker - Pitovi (M.H. 10), best setter - Tongpangsunep (M.H. 10) aser player of the tournament - Imkongsanen, Changtongya V/A shima par asem nem senpet sen meyi pungu-ngu (5000/- each) senpetsü.

Iba asayamung shibangba aser senpet agütsüba sentong nung N. Jamonger Ao, District Civil Supply Officer, Mokokchung tetushi tesemdanger liasü. Taküm iba trophy nung Mokokchung, Wokha, Kohima aser Dimapur nungi telok 12-i shilem agia liasü.

Tangha nung 4th Inter Society Swimming Competition ali

Dimapur, Luroi/August 23 (TYO): Tangha Baptist Youth Endeavour (TBYE) ajanga 4th Inter Society Swimming Competition sentong August 22, 2024 nü ayongzüka liasü, kong tetushi tesemdanger ka ama Block Development Officer (BDO), DRDA Longleng, P. Angam Longho-i sentong moatsü.

Iba tetoktepba ya Longleng district kübok Tangha village nung aliba Shemyung Pool nung agia liasü.

P. Angam Longho-i iba

sentong ya khenyongi balaka lir ta ashi aser lanurtem aser kaketshirtem dang iba ama sentong maneni ayongzüksü ajungshia liasü.

Iba amala sentong yagi yimtsüng nung tesunep aser tangatetep nung tashi itshiba kisüng masü saka kidanger yimtsüngtem nunga kongshitsü aser tarutsü nung iba tetoktepba tuluba akumtsü teimla lir, ta ashi.

Iba sentong nung Women Pastor TBC, K. Chüväü menden liasü aser Pastor

Tangha Baptist Church ajanga sentong tenzüka sarasademba sülen Youth Pastor TBC, Lamdok-i pela agizükba o jembia liasü.

Iba sentong nung Tangha Village chairman Hamphe Phom maser P. Longjah Phom nungeria o tatsütsü jembi aser Old Melody Singers temi temeja ken ka aten.

Iba sülen deacon TBC, Ongche-i sentong tembanga sarasadem aser tetushi tesemdangeri tetoktepba tenzüka liasü.

Manchester City-i Barcelona nungi Gundogan tanaben aniokogo

Manchester, Luroi/August 23 (Agencies): Manchester City-i Barcelona nungi taoba captain Ilkay Gundogan tanaben alizükba maparen tembangogo, koba küm ka atema alitsü aser ano ita 12 atsülangtsü lenmang lir.

German midfielder Gundogan ya 2016 küm Pep Guardiola ajanga asayar aniokba mezüngbuba liasü aser pa City nung küm tenet lir 2023 küm free transfer nung Barcelona-i ao.


Arishi küm 33 tain Gundogan ya Etihad nung alidang trophy 14 nguogo aser asaya 304 nung goal 60 agüja liasü.

"Ni Manchester City nung küm tenet aliba ya ni atema temulung asüba mapang ka liasü," ta pai ashi.

"Ni Pep akumtsüboba nisung ajaki meteta lir - alima nung manager tajungtibaji pa lir aser anogoshi pa den inyakba ajanga na asayar tajungba kumdaktsür. City indang tula tanaben asemtsü matateter," ta pai ashi.

Spain nung jangratema asayaba sülen club indang senotsü tsütsü timtem aliba ajanga Dani Olmo manioktetba sülen Barcelona-i Gundogan den pilatsü telemtetba agi.

Gundogan ya club nung sen timba aazüker asayar ka liasü, aser pa free transfer nung aoba ajanga Barcelona-i La



Liga spending restrictions sülen anidakba nung yaritsü.

"Ni tensa balaka nung yutsür aor, saka ni ainshiba ajanga senotsü tsütsü club yarira, ibaji ajanga ni kangabo mejashir," ta Gundogan-i Instagram nung zülutsü.

Campaign tasenba nung külemi asayatem yaritsü yongya atar saka Barcelona nung ita 12 aliba atema pelar, ta pai ashi.

Guardiola-i midfielder tanaben anioktsü ya meimlai liasü, ta Honibarnü shia liasü.

"Pa tanaben anioktsü atema takoktsü lenmang lapokdang onoki kecha shisabolua meliasü aser pa meyipa shilangba atema onok kanga pelar."

Germany atema 82 ben asayasang Gundogan ya Euro 2024 quarter-finals nung Spain-i par linük tsükdaktsüba sülen international asaya nungi anisüngzüksü sangdonga liasü.

STATE OSANG :

Tapak 2 nungi...

NVBDCP state review meeting...

Joint Director & SPO, NVBDCP, Dr. Neisakho Kere-i Nagaland nung NVBDCP inyakyim indang osang lemsatepba mapang, 2023 küm district ajanga nung Annual Parasite Incidence (API) ka dang tajemba liasü, ta ashi.

Ajisüaka pai Annual Blood Examination Rate (ABER) indang tebilemstü lemsatep, koba national target shilem 10 dang tajemba lir. 2022 küm shilem 9.53 aliba nungi tera timba kuma 2023 nung shilem 10.12 liaka taküm rate ajemogo, anungji nünkjidong tongteta meranga inyaktsüla, ta Dr. Kere-i ashi.

Tang tashi Kala-azar mesüra Filariasis cases kata mali, ta pai ashi saka state nung Chikungunya cases tali alitsü akok, kechiaser tendangtsü atema sample collection kangabo mali, ta Dr. Kere-i ashi.

Ramen tashidak agi shirangba kanga ajema kumogo aser 2018 küm cases 113 aliba nungi 2024 küm tang tashinung cases trok dang lir aser 2023 küm dengue cases 4,943 aliba

taküm 11 dang lir, ta pai ashi. Taoba küm Acute Encephalitis Syndrome cases 19 liasü saka taküm cases ti dang lir, ta pai ashi.

Dr. Kere-i blood slide collection tajungba kumdaktsütsü, district ajanga nung MBER tashi itshitsü ayongzüka liasü aser district tem dang ita shia cross-checking atema slides tem agütsütsü aser mapang shia IEC/BCC mapa inyaktsü ajungshia liasü.

Senior Regional Director of Imphal, Dr. L.A. Singh-i iba senden nung malaria certification documentation inyakyim indang jembia liasü.

Küm asem tashi atongtepa indigenous malaria cases mali aser prevention program yanglua lir ta sayuteta sorkar nungi asüngdangba sülen WHO-i linük ka nem malaria elimination certificate agütsür, ta pai rasaa ashi.

Malaria Elimination Certification Panel (MECP) ajanga report tem repranger aser independent evaluation agia tesem balala semdanger

aser health sector den sensaksemakar, aser iba sülen WHO Director-General ajanga certification atema telemtetba agir, ta Dr. Singh-i ashi aser NVBDCP staff temi meranga inyakba atema tenüngsang agüja liasü aser Nagaland nung malaria cases ya linük nung tajemtiba rongnung dena lir ta ashi.

Pai district balala dang malaria elimination certification angutsü atema maneni meranga inyaktsü ayongzüka liasü.

District 11 nungi NVBDCP staff temi iba senden nung parnok indang performance report tem agüja liasü, kong virtual yimya nung NCVBDC, Government of India nungi National Consultants tem dena liasü.

Iba senden nung Director (Health) DHFW, Dr. R Chubala Aier aden, kong Deputy Director, NVBDCP, Dr. Tinurenla Anichari menden liasü aser Public Health and Training Consultant NVBDCP, Imsubenla-i melepzüng o jembi.

BENDANGLI OSANG : Tapak 7 nungi...

Macron-i PM bushia France yimten...

"Ajisüaka tiri tang tashi pa indang sorkar ka kumtetner amai lir, saka onoki sorkar ka kumtettsü atema tematiba jenjang nung aruba political force - New Popular Front - dak keta lir," ta Castets-i ashi.

Tiri ato kilonser ka shimtsü atema anogo tejangja masü saka tekeratiba nung inyaktsü shiogo, ta socialist lenir Olivier Faure-i ashi.

Macron ya tang par Ensemble alliance kumtetba party tem ajurutsü aser iba sülen right-wing Republicans lenirtem ajurutsü.

Hombarnü pai far-right National Rally lenir Marine Le Pen aser Jordan Bardella den Eric Ciotti nunger den jembishinü akatsü. Ciotti ya Republican telok ka nung tekolak lir, shirnok election masüadang tanüngba party nungi balaka ao. Parnok ya election nung tasembuba

jenjang nung liasü. Menden 577 aliba National Assembly nung absolute majority atema menden 289 nüngdaka aliba ama party grouping katia menden nguteta mali.

Ajisüaka constitution kübok Macron-i parliament ya taruba küm meyi mapang tashi dissolve mesütettsü, anungji party ajungai agizükttetsüsa ato kilonser ka shimtsü akok.

Yimten yimsüsür temi jembiba rongnung taoba Socialist interior minister Bernard Cazeneuve aser Republicans nungi regional lenir Xavier Bertrand tenüng amshir.

Ajisüaka Macron-i tang tashi shiba yaritsü shia mali.

Election agir hopta tenet ajunger, saka pai tang tashi sorkar ka kumtettsü atema nübu tejangja monguteti tim atemer.

BILEMDANGANG

"Nisung shinga pei asentzü nung arakseta masü."